

四庫全書

集部

欽定四庫全書

雞肋集卷五十八目錄

啟

與謝寶文啟

謝淮南漕彭元施啟

與京東漕黃朝散啟

答謝華守趙子剛賀入館啟

與臺守向宗旦啟

上河北漕呂進伯所業啟

代胡唐臣授蘇幕與使者啟

授澶州司戶答韓諫議璠請充教授啟

回鄆城孫簿啟

賀教授陳履常啟

答謝狀元李常寧啟

答謝宗室奉議啟

答賀李祥改宣德啟

答亳州趙教授啟

太學答學生林自啟

答王勲謝貢啟

答陸倕啟

雞肋集卷五十八目錄

欽定四庫全書

雞肋集卷五十八

宋 晁補之 撰

啟

與謝寶文啟

竊審再膺宸檢還鎮淮邦副朝廷因任之求慰民吏去思之意伏惟歡慶恭以某官忠蓋耆德文詞宿儒蚤記淵衷徧躋法從長人京邑豈徒前有之趙張控馭藩垣真是禁中之頗牧惟江陽氣俗之舊有棠陰惠化之餘

農絕帶牛尚未忘於勸課兒騎竹馬願復見於行春惟  
暫屈於統綏固不勞於經理而補之倦游文館得請佐  
州曾未造於門牆將獲依於麾榮自惟幸會尤劇欣愉  
方冬返凝取道遼遠

謝淮南漕彭元施啟

吏能何補公舉過優迂疎內循光價已倍伏念補之無  
自得之學非適時之才間闢一名黽俛十考庠校五歲  
館閣四年不能穡而取禾退默既慙於素飽未操刀而

欲割進為又懼於得傷故嘗冒請於外官庶幾自試於  
民事而託部封之未久辱咳唾之獨先靜言思之何以  
得此斯蓋伏遇某官忠以事上恕於取人過譽斗筲俾  
叅瑚璉李長樂之許文舉非為通家暴公子之知不疑  
儻緣一語人之幸會勢豈偶然誓堅許國之心終得報  
恩之所感荷激切不知所裁

與京東漕黃朝散啟

伏審祗膺眷擢榮總漕將已擇剛辰初臨治部伏惟慶



慰恭以某官才高當世聲發妙齡行誼規於古人文章  
固其餘事鴻干以序美既載於兩朝玉立而溫威自宣  
於百郡屬河朔流移之始復而山東罷瘵之未蘇庶幾  
小豐有望卒歲故暫假問民之寄豈久迂攬轡之行補  
之頃濫麾符方茲譴謫何意周旋之舊乃依刺舉之嚴  
捨曰蘇孺文之天迂疎敢有或者李將軍之地寬大所  
為非輒病於至公實少伸於知己永言幸會莫罄叙陳

答謝華守趙子剛賀入館啓

頃者効官河外託庇府中違離屢易於歲華傾想第勤  
於魂夢踈慵成癖問訊闕修伏惟坐鎮安閑履時休裕  
補之才能甚薄學術亦迂比緣明詔之求偶用輔臣之  
薦道山羣玉之地濫跡莫遑長林豐草之思此心固在  
斯蓋某官忠信好禮彊恕行仁吹噓所加隱伏皆奮蓋  
嘗勉裁尺牘驟叙鄙誠置几塵生開緘字滅既後時而  
莫致滋撫事以為慙乃蒙眷私特枉慶賀辭極瓊琳之  
美情踰骨肉之親顧惟感銘尤劇衷悃新元肇布介福

來同

與臺守向宗旦啓

頃緣契援嘗奉標儀去牆屏之已賒託麾符而浚幸恭  
以某官溫良植已忠蓋在公勲名烜赫於相門嫻戚蟬  
聯於帝室不由此進自以才稱騫翔省寺之華更踐藩  
垣之重居有善政去嘗見思而補之疎拙領州乖違得  
譴未更歲律仍避親嫌仰寬大之足依俯飄搖而自慰  
奔馳敢後恭對可期

上河北漕呂進伯所業啟

草木有榮逢春乃耀鳥蟲含響得氣則鳴物誠甚微情  
乃如此士有知識志宜激昂自憐孤生誤喜末學執技  
不化知己益消寅緣官曹統莅使部竊以畏大人於早  
歲事君子於一朝向塵長趨人進亦進登堂危坐衆言  
則言不圖高明見假顏色問訊所學開擴其愚昨成至  
言所要知道退念空語滋不欲陳然而殫廢楮毫棄滯  
箱簾憤悱已吐蕪蔓莫莫刪猶望牛歌足觀蠅墨可綴察

鄙心於甯子成拙繪於曹生則雖孔門未廢由瑟尚或有取不為無庸

代胡唐臣授蘇幕與使者啓

此者忝命宸廷備員州幕仰威容之固久託封部以為光竊自思惟良渙幸會伏念某才出中下譽乏鮮明雖任使之粗更顧毫末之未立祇惕譴尤之後推顏禍罰之餘豈敢進求智挈餅而安取庶幾分守恩弛負之已多此蓋伏遇某官忠以事君恕於接物蕭生論議寧忘

意於本朝范子澄清蓋有心於天下寅緣竊食邂逅望  
塵捧檄束裝計官期之良過登堂聞教況吏政之可師  
欣忭之情倍百常品

授澶州司戶答韓諫議璫請充教授啟

竊以貴賤位殊義非均則有所不答賢愚術異勢既絕  
則無以相求蓋明公在上之達尊而不肖衆人之晚遇  
解褐一命從軍大邦以未嘗知名而過聽獨收故不待  
望履而陳書犯分罪實出於不韙誅宜獲於非常敢謂

伏蒙某官寬裕有容威嚴曲霽猥以世間之盛禮施於  
麾下之鰥生屈記室以裁牋賜家童而返報往來嫌於  
敵體進退越於常倫愧汗莫堪駭情無措炳若文章之  
眩目聳然藜藿之驚心上煩開府之知下無國士之稱  
至於假資助乏輟藥代徒自惟平生得此固寡三復敢  
置累息弗寧蓋補之才實竊疎學尤拙陋幼雖有志壯  
益無聞幸邁明昌預霑教養庶幾同小子之有造未敢  
與先生而並行正使米鹽効勤猶病弗稱若復庠序肄

業允非素長伏况門下德誼之最隆府中衣冠之甚美  
鄒枚毫牘之侍應劉樽俎之陪足以議論古今酬酢左  
右豈宜下陳無似之賤吏乃辱大人當路之末光拜教  
至榮拊心益忝請自隗始私不忘築臺之初即以遂行  
倘或有奉盤之頃斂板就列計日有期託庇門闌終身  
悃悃惶懼激切之至

回鄆城孫簿啟

麋鹿情疎但記蒿芩之樂鵲鸞跡遠無心羽翮之追忽



被除音復叨守土髮星星而久憤綬若若以增慙敢圖  
眷獎之深首辱緘題之慶徒欽雅致冀越常流偉初奮  
於仕塗藹已揚於才譽身相為援豈無用力之公卿意  
獨與親乃在退藏之農圃將高懷之固異實近世之所  
稀補之自信良堅與庸已甚枉瓊瑤之為好撫蓬甕以  
生輝感荷之誠倍百常品

賀教授陳履常啟

擢領掾曹歸臨鄉校與從游之良舊私慰喜以居多竊

惟國之求才病取捨之膠於法士之涉世患進退之失  
其中設科舉爵位以誘人假誦數詞章以干祿須其出  
試則鄉黨自好者耻夫屢獻不以禮際則山林長往者  
豈其肯來故上安於有司之區區糊名以為公而士惑  
於古人之皇皇載質以為辱莫聞覽德之鳳率多食餌  
之魚恭以某官行獨而通志潔而降不落落以如玉矧  
泛泛其若鳬窮無立錐術可濟國至於博覽之學絕出  
之文要其平生固曰餘事尚不屑去安有求聞聲自籍

於諸公章數騰於當宁拔起閭里朋類之榮收還妻孥  
親黨所喜未促公車之詔聊從泮水之行庶觀成山必  
自累土辭尊及富仕何往而非安有為與行志苟存而  
皆可貽牋良幸修慶獨稽傾詠之誠倍於儕等

答謝狀元李常寧啟

摘詞中禁擢秀羣豪一鳴而驚閭里爭傳於盛事三道  
之要朝廷相賀於得人伏以某官藏器於身待詔而往  
文非時好近灝噩之商周經本心通無異同之王鄭囊

雖出穎郵傳馳聲望冠蓋以傾風固其素願過蓬茅而  
委質非所宜堪豈徒一戰而稱雄庶觀千里之自此忻  
愉良劇敷叙何窮

荅謝宗室奉議啟

程文入等恩詔換官起身玉牒之華通籍金閨之貴伏  
惟慶慰竊以邦國之建本支是崇變商餘風周化行於  
麟趾懲秦孤立漢勢定於犬牙豈徒魯衛兄弟之俱賢  
固宜向歆父子之間出逮觀近世莫盛李唐持鈞軸以

當朝適之首出以文章而傳世長吉獨先聲明迄今想  
像未泯恭惟聖世尤篤宗盟惜夫飽祿廩而宴安故使  
學詩書而進取及茲歷歲寔得聞人新恩奉議稟性茂  
良修詞敏即恥從派屬輩居環衛之中欲以功名自致  
薦紳之上果緣藝選驟改文班同列相矜一時盛觀竚  
騫騰於夷路益開發於遠圖先枉緘封過形謙挹感銘  
良劇敷叙奚殫

答賀李祥改宣德啟

延對宸廷改榮京秩從游茲舊慰喜良多恭以宣德懿  
行不羣令儀可度粵從幼學夙有俊聲下帷未省窺園  
持竿寧悟流麥其精如此故資之滾珠玉蘊含山川輝  
媚自當名世豈獨傳家補之氣合相求心均莫逆綦綦  
沈之何取櫛株拘之自留臨水送將牛羊方下望風懷  
想鴻雁欲來庶幾逢聲子之班荆且復過孟公而投轄  
未遑馳慶先辱流音尚阻盍簪惟期彊針

答亳州趙教授啟

茲緣罪譴復避親嫌跂才譽之素勤聯官曹而深幸恭  
以教授推官端良可度超羣不羣早收科第之榮方莅  
膠庠之佚粹精古學本自得於下帷敏捷高辭咸相傳  
於倚馬操惟幽而不改聲乃大而遠聞倦飛聊比於一  
枝築室尚容於三徑先煩慶問尤認眷私感服忻愉併  
增誠悃

太學答學生林自啟

竊審論秀辟雍登榮造士伏惟慶慰上舍先輩懿行可

度美才不羣負笈徒行豈辭李固之千里違親忍志未  
厭何蕃之五年故能通達大成文史足用升諸鄉而有  
素告於王而可官以補之預在膠庠特貽賤翰推先非  
據感服徒深

答王勲謝貢啟

數從升補初預賓興雖學制之同然必鄉評之所與竊  
以貢士先輩幼稟雋異早勤編摩敏七步之修詞飽五  
車之彊記李廣百戰未立寸功何蕃一歸動輒累歲阨



窮已甚操守更堅果緣考察之公往偕造秀之選國有道化方革浮華士惟忠良乃稱推擇九層始於累土一鳴可以驚人豈但顯親固將行義願思飯粟務正學以言而發身毋侈輜車稱稽古之力以辱士先承緘翰但劇感銘

謝陸倕啟

輟自班聯屈臨州郡涓辰之善視事云初伏惟慶慰恭以某官經術博通文詞敏贍賢關論秀蚤成金玉之章

卿寺須才久躡鵷鴻之綴英猷方顯雅致不羣自求外  
官欲試民事聳聞交印已揚慈惠之聲即見賜環復在  
清華之選補之田間託跡萍梗因風當趨牆屏之嚴以  
伸桑梓之恪屬茲被命既迫赴官愧流問之辱先悵叅  
承之莫遂

雞肋集卷五十八

欽定四庫全書

雞肋集卷五十九目錄

啟

赴揚州上太守王資政正仲啟

與交代范峒啟

與淮南提刑賈殿院啟

與淮南監司啟

答揚州教授曾旼啟

上揚守王正仲啟

與淮東提刑王司諫啟

答揚守判官趙奉議啟

答致仕劉敏大夫啟

與京東漕張道順啟

與京東提刑趙景仁啟

答淄守啟

與淄倅啟

與提舉鄭彥能啟

與京東漕呂直父啟

答滑守李孝純啟

賀知府趙待制移鎮啟

謝提刑上官正言啟

留臺韓朝請到狀啟

答澠守啟

揚州泛用賀冬啟

元日賀啟

元日賀啟

答交代中散啟

與李中大啟

謝呂大夫啟

答通判朝奉啟

代韓太中賀徐中丞啟

與淮南監司啟

謝解啟

公為求親啟

送幣啟

公似求親啟

代謝求親啟

許親啟

送幣啟

求親啟



雞肋集卷五十九目錄

欽定四庫全書

雞肋集卷五十九

宋 晁補之 撰

啟

赴揚州上太守王資政正仲啟

比者得請宸廷備員州佐蚤在陶鈞之內久辭牆屏之  
嚴寅緣庇依欣喜幸會恭惟某官道德世範文詞儒宗  
龍虎之得風雲主威益重山淵之有珠玉國勢增華加  
以仁厚不矜直方有體倦經為於機政思宴息於藩維

而補之冊府後來書生孤立慙梧鼠之五技窘侏儒之一囊江海之思日縈魂夢麾符之蔭與有光榮春水已生吳艤當具尚曹裝之未促儻荀御之可容鄉往之誠倍百常品

與交代范峒啟

蒙恩外補承乏後塵惟慕誼之素勤獲趨風而自慶恭以臬官夙懷賢業藹有令名行已不撓而衆推居官所至而民願尚淹器幹屈佐藩維補之質薄自憐學迂寡

與陪英髦於中秘非所宜堪奉甘旨於宴閑蓋其私便  
企青雲而雖舊繼白雪以良難行造門牆粗窺矩範欣  
愉幸會悃悃奚殫

與淮南提刑賈殿院啟

蒙恩外補竊祿便親望履幕以良勤去門牆之未久敢  
圖官守遂在部封恭惟某官道業古人之期風聲列位  
之冠以義出處繫時重輕雖雅意不忘於本朝而直諫  
自難於居內久傾公議尚屈遠猷補之質薄自憐學迂

寡用糜丹鉛於冊府固乏毫釐佐條教於藩城足殫驚  
蹇趨叅良過庇賴為榮瞻詠欣愉併深悃悞

與淮南監司啟

蒙恩補外竊祿便親仰風望之素隆傾誠心之固久敢  
圖官守遂在部封恭惟某官賢業藹聞公才屢試奉行  
寬大之令威亦暢於屬城愛養疲瘵之氓財不虧於成  
賦尚淹使指行副褒延補之質薄自憐學迂寡用糜丹  
鉛於冊府固乏毫釐佐條教於藩城足殫驚蹇趨叅良

通庇賴為榮瞻詠欣愉併浚悃悞

答揚州教授曾旼啟

比者請外便親蒙恩佐郡往歲周旋之舊彌年契濶之懷又此從遊良為幸會恭以某官精智洞物高才邁羣倚相讀書博洽窮於世表正平作賦敏捷出於坐中科甲先登名譽早立當居要近寧久宴閑補之自以拙艱安於疎逖青雲魏闕初驚日月之遙春水隋河已夢江湖之上聊復爾耳慙為米之淵明于時言言喜班荆之

聲子清和在候導養適宜先辱音題尤增感刻

上揚守王正仲啟

近承恩檢叨備府僚嘗貢郵牋僭塵台几敢謂謙尊之  
盛德曾無疎賤之遐遺飭書記以染修付候兵而傳致  
獎收踰分感愧并心伏審得請過家方春展墓散黃金  
之百鎰見白髮之故人鷁舟歸濟於晴江虎節還臨於  
治部即日鎮撫多暇神明用休補之蚤被陶甄久辭牆  
屏載勤舟楫奉甘旨以知榮適及郊圻聽歌謠而自慰

意行調於元鼎難久託於後車用此傾馳不忘魂寐清  
和當候拜伏可期

與淮東提刑王司諫啟

被選中宸改臨東部獲趨風之良舊思去德之未遙側  
聆除音尤喜幸會恭以某官學術知古才謀適時直節  
在於諫垣能聲聞於省闈訪民恫苦姑暫屈於登車副  
上褒延已久虛於前席補之才質人後趣操衆違比緣  
將母之求偶遂佐州之請敢圖官守預占提封庶自竭



於疲駕斲永依於庇賴欣愉鄉往併劇下情

答揚州判官趙奉議啟

辟書畫可賓幕改除惟跂慕之素勤獲從游而私幸恭  
以某官美才自立佳譽藹傳鳳穴一翰殊有超宗之質  
龍門獨上早膺元禮之知念契闊之未遙辱音題而尤  
喜炎歆方熾款晤可期

答致仕劉敏大夫啟

竊啟風聲未親晤語枉書郵之先貺審舟御之將臨即

日順履凝嚴茂迎福祉某官賢誼甚美公才素高浮榮  
如過於蚊蚋苦節自期於松栢幸緣寓止當遂從游載  
惟欣慰之多非復叙陳之究

與京東漕張道順啟

念趨風之良舊復去德之未遙遂託部封實為幸會恭  
以某官博學知古通才適時揚歷省闡名獨高於羣彥  
從容使指威自聳於屬城方聖政之又新豈賢猷之久  
屈補之內慙竊祿自乞試州歲比不登民逃未復撫循

有道在躬守於詔條施舍不煩可面承於教約炎歎方  
熾叅奉有期

與京東提刑趙景仁啟

光膺帝制出領使權已次封圻初交印節伏惟慶慰以  
某官高才敏達雅操靖嘉玉立班行固朝廷之妙選風  
生羣聽藹臺省之休聲尚屈遠猷俯臨一道行著澄清  
之績亟歸侍從之華而補之請外便親得官屬郡竊伺  
張擅之邇將申守土之恭欣忭之誠倍百常品

答溜守啟

去闕廷之伊邇施負擔之云初畫界相望親仁良幸補  
之世家單系冊府後來文無取於將明武不足以捍衛  
每自慙於索米姑求試於長民伏遇某官忠蓋事君中  
和布政顧何功於製錦竊自喜於分光未暇染修先承  
慶問感銘殊厚敷述難窮

與溜倅啟

著述寡功迂疎畏罪輒自陳於將母偶得請於為州敢

圖弛負之初乃辱馳書之貺感銘殊厚傾詠益勤恭惟  
某官懿行溫良公才敏邵題輿以俟偉仲舉之高名投  
傳而歸小巨卿之獨操宜入聯於省寺寧久困於簿書  
而補之曩昔宦游寅緣晤接回首十年之舊相忘數舍  
之間尚阻合并重增鄉往

與提舉鄭彥能啟

頃寓都城偶連牆仞自惟疎拙方力請於郡章亦值高  
明將出宣於使指幸趨風之頗數復去德之未遙間關

行路之勤倥偬交符之始仰依大庇內激愚衷伏念補  
之素不逮人猶知信已少時薄技誠何取於屠龍長歲  
虛名固無堪於挹酒窖中塗之囊跋賴十手之挽推矧  
在仁賢最為知舊當法令再行之際屬疲篤承乏之時  
庶幾平均未廢詢採恭惟某官忠以事上惠於撫民嘗  
力學夫古人知為政之大體清河恃孺文之故敢有是  
心渤海遇勝之之賢儻緣今日官曹冗甚書牘闕然尚  
阻叅承重增延跂

與京東漕呂直父啟

被旨中宸改臨東部凡居庥庇舉集欣愉恭以某官業  
履忠純才謀敏達當先朝之慎東在羣俊之上游使指  
屢將守麾薦擁居有顯効去常見思方聖政之又新豈  
賢猷之尚屈而補之自惟疎拙頃辱交承復幸提封獲  
依刺舉惠留多袴民借寇以無由威暢連城盜奔秦而  
先改趨叅甫邇頌詠尤渙

答滑守李孝純啟

久託姻盟未親賢度一麾假守釋負擔之云初千里贈  
言想音容而如接媿慙既厚欣喜并深恭以某官懿行  
自將高才挺出蚤踐揚於要宦方烜赫於能名列戟映  
門固大家之流澤褰帷行部有循吏之遺風側聆交符  
幸此授館將獲踵門求見之便以慰慕義無窮之心契  
闊未間傾馳尤劇

賀知府趙待制移鎮啟

光被制書改司京鑰凡居庥庇舉集歡愉恭以某官中



正而通優游以法蘊經邦之遠業在志學之妙年入奉  
清光文采昭回之上出臨方面折衝燕笑之間自當綱  
紀朝廷訏謨帷幄尚茲均佚咸謂非宜補之疎拙守藩  
乖違得罪敢圖恩宥乃佐留居仰大厦之足依俯孤蹤  
而自慰妍和取道順履逢休

謝提刑上官正言啟

奉法不虔蒙恩薄譴何意拙疎之跡乃依刺舉之嚴莅  
事云初省躬深幸恭以某官風猷甚遠德操不回學蓋

在於誠身仕不蘄於遇合少馳妙譽蚤掇上科夷考平生實皆餘事尚出將於使指行歸侍於禁垣而補之樗朽無堪萍蓬惟寄去門牆之滋久備官屬以為榮收堂下之言雖仰煩於大雅効囊中之穎茲方窘於末塗更願須以歲時寬其轡策庶幾報稱可積毫釐感愧之懷倍百常品

留臺韓朝請到狀啟

奉法不虔蒙恩薄譴敢圖佐守遂隸分臺眷言離索之

情獲此從游之幸恭以某官慶傳累世譽滿本朝子產  
知然明之心殊非今日文舉待正平之少固與忘年馬  
伏櫪而長思萍因風而相值人生投分勢豈偶然念布  
叙以未遑辱音題之良厚欣愉感荷倍百鄙懷

答澠守啟

自以拙艱安於疎逖抗章得請交印云初傾心德誼之  
勤引領疆圻之邇願馳書之固久特櫻事而未遑恭惟  
某官慈惠為春清明可鑑帶牛緣畝不但格於頑民渡

虎去封已先柔於異類將入補公卿之缺豈惟錫車劔  
之榮慙製錦之難工幸分光之無損首貽慶問倍荷眷  
私屬守郡符阻親履幕

揚州泛用賀冬啟

銅儀軫轉肇南陸之景長緹室飄颻知黃宮之氣至人  
惟剛德天與介休恭以某官篤實方中柔嘉暢外世大  
來而小往時陽息而陰消用此進為孰量事業悵坐縻  
於官局阻趨慶於賓墀欣頌之誠倍越常品

元日賀啟

羊雞被惡道四氣之始和椒栢泛醇薦百年之難老惟  
人視履與物咸新恭以某官中正以通柔嘉維則入陪  
嚴禁屢輸竭於忠猷出總連城暫布宣於惠澤順迎端  
月茂擁介休悵拘繫於郡章阻叅承於戎幕永言善頌  
數倍常情

元日賀啟

羊雞被惡道四氣之始和椒栢薦醇介百年之難老惟

人視履與物咸新恭以某官中正以通柔嘉維則佩牛  
還畝知警夜之可虛竹馬迎郊想班春之方暇順迎端  
月茂擁殊休悵拘繫於郡章阻叅承於賓幕永言善頌  
數倍常情

答交代中散啟

拜恩中禁假守瀕河念仳別之尚新獲交承而自幸恭  
以某官德誼粹美材猷敏彊久東在於班聯暫屈臨於  
刺舉將聞顯用諸大夫皆曰賢固有規模舊令尹必以

告未遑修問先辱流音叅晤可期欣愉良劇

與李中大啟

倦游郎省得請藩麾平居慕望之勤今此晤承之便恭  
以某官志履端潔才能敏長學穉齒而蚤成德耆年而  
彌邵踐揚臺閣蓋政事之猶存穎脫雲泉固風聲之可  
尚馳書尚闕流問辱先傾蓋足榮驅車竊抃

謝呂大夫啟

請外便私蒙恩補郡去闕庭之伊邇弛負擔之云初問

俗何先聞風增慕補之世家單系冊府後來文無取於  
將明武不足以捍衛每內慙於索米姑求試於長民伏  
遇某官脫畧軒裳燕居里第顧何功於報國竊自喜於  
親仁未暇染修先承榮問感銘良劇敷述奚殫

答通判朝奉啟

得請宸庭出分郡寄惟傾風之素切偶聯事以為榮恭  
惟某官德誼致修聲猷自奮揚歷閨臺之舊回翔藩閫  
之游咸謂非宜安能久屈庶幾有政賴別駕以不空固



願無何如淮陽之高卧叅承良邇欣幸尤深

代韓太中賀徐中丞啟

躋榮螭陛進總霜臺恭惟慶慰伏以某官天才俊良神  
氣宏偉起于磐之鴻漸為溟海之鵬搏操行古人之期  
謨謀當代之映賈誼之遭文帝千載所難馬周之遇太  
宗一言而合亟任掌綸之選迅陞專席之雄光華儒林  
洋溢士論側聆新命俯愜素誠限繫外官阻申慶謁永  
言欣忭曷罄叙陳

與淮南監司啟

罪譴佐州親嫌易地倚門牆之良舊託封部之云初內  
顧迂疎尤深幸會伏念補之少而孤立壯不適時誤貼  
職於書林本無學業濫承流於藩郡祇用資塗敢攀鵠  
鵠之高嬉自笑駢嬰之易滿黑生白犢寧論無妄之災  
醜效美顰宜取求全之毀賴聖時之忠厚俾愚分以便  
安每自揣循惟知憐惕伏遇某官至誠樂育大雅不羣  
恕常用於一言威自行於千里尚寬刺舉小假歲時倘

不重於悔尤或粗收於毫末

謝解啟

伏覩解榜偶被薦送者迫彊敵以當前初虞逐北挈孤  
軍而冒戰遽預先登進叨非據之榮退積循涯之愧竊  
以治非一道三代之所同功學非一師百聖之所並字  
更末流於淺鮮之後追大本於茫忽之為五官猶具於  
天根六鑿未仍於物偽行義忠信粹乎常得於固存言  
語文章卓然皆出於可用教化之所被及風俗之所影

隨中國無異於四方野人知學於君子王者之迹未熄  
古人之體尚存少變而為晚周大壞而為戰國處士以  
詖行自售公子以得人相傾離騷濫於辭章兵法窮於  
威武禁游說者縱橫以辯顯任使者推理以雄俗僻則  
吳越無秀民照奇則鄒魯無異行陵夷百世鹵莽一塗  
漢沿秦餘而莫醇唐因隋舊而未善際真人之撫運混  
雜霸之餘墟英宗廣於規謨仁祖備乎文物今上闢圖  
書之府重禮樂之司息誦數為腐儒廢雕蟲為土苴奮

乎百世之後觀此六經之難以足取人謂宜得士如補之者拙非世用僻與衆違有轉喉觸諱之窮無炙手可熱之助流離百狀辜負寸心措紳之所未信而無庸鄉黨之所共輕而竊笑踽踽自守無意於舍龜偃偃何從迨同於即鹿亦嘗側聞長者之論庶幾得上君子之堂十載屬文七年論學蚤濫舉首輒困退飛託患難之餘生守迂疎之舊習仰箕裘而莫繼俯蓬甕以增羞望絕亨嘉分投窮籍詩常招隱書或絕交它人謂其逆施智

者以謂非異不覺歲月之易失竊省功名而自驚遠舉  
何為聞虛絃之已怯相忘可樂忘芳餌以復來然而學  
不能偶當世之方圓材不足當大人之取舍僂俛自力  
孿拳莫堪一字固微屢經營於燥吻萬言良富愧滂沛  
於搖毫尚賴庶明過辱題品掇其片善躋以上游斯蓋  
伏遇某官大雅不羣至誠樂與譬之水正錯而不動與  
夫衡誠陳而不欺有形焉得而苟藏無物不可以自試  
故容叢陋亦預甄收某敢不增益淺聞激昂壯節鵬搏

有待固未忘九萬之程狗盜為功猶不愧三千之客

公為求親啟

慶長舊望雖懷齊鄭之殊投分明時實許是張之並輒  
恃斷金之好曾忘倚玉之嫌仲孺姪孫吏部長男公為  
不逮於人粗教以義伏承賢弟龍圖位第十一小娘子  
閭儀世邵女美幼聞妾伸納采之誠私幸宜家之慶不  
忘故分終惠好音

送幣啟

近者輒布私誠仰希高援愧山川之能受報金玉之好  
音不鄙單平更篤盟好及泮水之未幾羞束鹿之惟時  
念孔李之通家寧慙於舊庶媿姜之五世殊未可量永  
言欣愉莫罄陳叙不腆禮幣具如別牋

公似求親啟

通家奕世如蘭未喻於夙心繼好諸孫投李敢期於厚  
報載敦合姓敢替問名伏承某人女善慶所鍾德容兼  
茂某人男屬方幼學期以成人男既彼甥女惟此出契



援踰於它族禮律可以通昏鳴鳳其昌已篤媯姜之舊  
同車信美不遑齊鄭之嫌跂望良勤好音無闕

代謝求親啟

近枉行媒特傳嘉命高門絕企實懷賈詡之私見子良  
勤願附王謙之義仰慙眷厚敢布悃誠伏承某男蚤聞  
俊良自立孝悌無綺紉餘子之好有詩書寒士之風某  
女方妙年齡未閑警戒采蘋南澗雖法度之可追如舜  
同車顧德音之未著承言感佩難遽遵承

許親啟

比念鄙宗難攀高援輒布敢辭之義重煩同好之言詠  
魴鯉之詩雖有慙於齊宋思冠冕之胄誠竊慕於崔盧  
矧繾綣之已勤欲逡巡而安可願言託附實有光榮感  
刻良深敷陳莫究


送幣啟

疊煩信紹申篤嘉盟煥然純帛之儀寵以問名之耗蘿  
施松柏後方昌而莫與京桃報瓊瑤物雖薄而用可重

不腆實篚具如別牋

求親啟

台鼎高門金蘭重義已幸趨風之舊矧煩繼好之修令  
弟某官制行孝恭稟資英爽幹蠱優於用譽視履宜於  
考祥某房第幾孫女蚤慎閨儀粗知婦教乃求葑菲俾  
結絲蘿承命愧慙披詞榮耀竊欽慶善方膺五世之昌  
輒昧單平願布一言之諾具於銘感豈盡敷陳微物將  
誠具如別幅



雞肋集卷五十九

欽定四庫全書

集部

雞肋集卷

六十至  
六十二

詳校官庶吉士<sub>臣</sub>初喬齡

侍讀<sub>臣</sub>孫球覆勘

覆校官主事<sub>臣</sub>李駿

校對官中書<sub>臣</sub>王鍾泰

謄錄監生<sub>臣</sub>薛登瀛

欽定四庫全書

雞肋集卷六十目錄

祭文

北京為神宗靈駕發引告祭文

河北轉運司告祭文

河北提舉司告祭文

禮部為欽慈皇后發引百官告祭文

北京祭留守王太尉文

北京國子監奉詔封孟荀揚韓告先聖文

詔封孟荀揚韓告先師文

筮地告先考著作文

告六叔父寺丞文

北京祭措置李宣德文

除夕祭北京教授廨土地神文

罷齊州先塋焚黃告祭文

代澶州韓諫議祭河文



代祭龍女文

國子監祭司馬溫公文

館閣祭呂申公文

代尚書侍郎兩制祭魏王文

祭歐陽文忠公夫人薛氏文

同李昭玘陳察祭贈太師李公文

代王資政祭李少保文

祭陝州二叔父文

祭外舅兵部杜侍郎文

祭南京留守刑部杜侍郎文

雞肋集卷六十目錄

欽定四庫全書

雞肋集卷六十

宋 晁補之 撰

祭文

北京為神宗靈駕發引告祭文

薤露朝晞歎九齡之夢闌宮車晏出驚七月之期臻崩  
天增杞國之思喪考妣堯人之慕因山克就同軌具來  
羹牆痛劇於中宸弓劍哀纏於羣辟安知帝所逍遙廣  
樂之觀空有人間惆悵汾河之詠戒塗雒鞏接軫大伾

竊守提封是虔告享風雲改色羽衛無暉背通汴之神  
臬指清伊之吉壤惟宗祧傳聖謳歌訟獄以咸歸而功  
德在人禮樂政刑之未悖不顯亦世無疆惟休臣等祇  
奉官箴阻瞻牆巒攀號莫逮洒血摧心

河北轉運司告祭文

吳穹不弔仙馭難追爰諏七月之期是屆萬方之軌邈  
鼎湖之龍去天上景長空汾水之雁飛人間事改續服  
懋重熙之化見牆昭大孝之思矧茲臣鄰以逮黎庶仰

瞻何所擗踊寧堪法仗載嚴悲笳互咽乘白雲而安往  
剛黃鳥以無從惟夫神功莫大而難知固與景命俱傳  
而不息臣等各縻官守阻望靈輶徒有忠誠攀號洒血  
河北提舉司告祭文

因山之制七月遒臻同軌之期萬方咸在弓劍留鼎湖  
之慕衣冠餘渭水之思悵悵徂秋已變風雲之慘淒涼  
入夜更增笳鼓之悲虞牆徒劇於見堯夏服仍勤於纘  
禹著龜告吉陵寢即安刪黃鳥以無從訴蒼穹而何所

惟神功不宰固妙物以難知且聖祚有歸宜與天而俱  
永臣等孤忠徒切行奠莫追西望靈輶攀號雨血

禮部為欽慈皇后發引百官告祭文

媯為舜氏本明德之方興陳以滿封實故家之始大豈  
特活千人而有祚固當流八世而莫京允屬盛期篤生  
碩媛葛之為綌儉可化於女工雞則匪蠅庶無憎於朝  
事是用膺天眷命開國慶基肇焉至之裡郊肆龍飛之  
澤寓而不逮東朝之養已驚仙馭之遙抱泣珠襦初啟

南阡之宅伸哀寶冊載嚴西寢之封邈永裕之真游霽  
欽慈之徽號雲章五字忍聞追遠之聲風動萬人咸識  
因親之化將以貽休有煒垂佑無疆臣等陳力官聯羞  
誠祖奠靈輶莫駐摧隕何堪

北京祭留守王太尉文

維元豐八年八月某日某官某等謹以清酌庶羞之奠  
致祭于故留守彰武節度王公之靈曰書載箕子為武  
王陳洪範嚮用五福竊嘗有言天不能畀人福也曰有

嚮用者焉惟君子好德故能受福于天昔賈誼以能誦詩書屬文起家洛陽生十八年豈如公孫區區春秋雜說白紛始也如推上乎菑川惟仁祖以仁覆天下天下含舖鼓腹不知上德之然其文章爾雅同風漢氏繫公所以潤色公不有而誰先其入翰林丞御史尹開封使三司而士相與賀者公且執天下之權其領十五州守三都以使南院班二府者公雖不大用而位亦益遷粵主上稽古思道未有命戒先者父者將以乞言乃方叔



元老維曰壯猷豈其驛驛久董夫戎旃謂公當促舍人之裝而公方且導引辟穀欲棄人間之陋從赤松以脩然奄乎不知何往意者以形為蜩甲其不與物盡者固已飄乎委去而登仙躋公堂以縮酒猶髻髻乎平日而僂然惟几莫我覲而悲填若夫勤勞啓沃心存天下垂五十載者則豈惟其僚屬之所私詠而燦然不泯有旂常兮茲傳

北京國子監奉詔封孟荀揚韓告先聖文

維元豐七年月日河南府左軍巡判官充北京國子監教授晁補之謹以清酌庶羞之奠敢昭告于至聖文宣王曰昔周失厥道紀綱用微惟時夫子杲杲出日披其重祿為萬世明夫子既沒揚墨是肆爰有孟氏詞而闢之荼蓼既薈嘉苗孔殖于今其功人以配禹俾遇夫子蓋顏淵徒自時百家蠡午並作承孟氏後荀况揚雄降秦終漢教用不隕俾夫子道炳然復彰魏晉而還文事滋落學不為已其舌肆好猗歟韓愈始以文顯厦屋將

覆勇於敢扶唐三百年斯人惟偉天啓我宋咸秩無文  
追求四賢崇以爵號從夫子後不瑕有光更千萬年學  
者咸仰今有司承詔封孟軻為鄒國公與充國公同配  
食荀况為蘭陵伯揚雄為成都伯韓愈為昌黎伯並從  
祀謹撰吉日以告尚饗

詔封孟荀揚韓告先師文

維元豐七年月日河南左軍巡判官充北京國子監教  
授晁補之謹以清酌庶羞之奠敢昭告于先師充國公

曰昔我夫子有徒三千惟公好學未達一間爰有孟氏  
聞而知之與公異時合若符節孟氏既沒荀揚嗣興是  
三大儒吐詞為經末流至唐篆刻是驚有賢韓氏奮而  
學古達道之塞于儒有功微言賴茲不絕如綫粵宋七  
世咸秩無文卷龍驚冕曰公若伯從我夫子興吾先師  
洋洋俱傳百世不熄今有司承詔封孟子為鄒國公配  
食文宣王荀子為蘭陵伯揚子為成都伯韓子為昌黎  
伯並從祀謹撰吉日以告尚饗

筮地告先考著作文

維元豐七年十月日男補之將之謹以清酌庶羞之奠  
告于先考著作之靈曰昔我先人率德顧弗永年乃不  
肖子補之將之不能必成葬不以時乃尚官學四方惟  
歲時望祭有醜肆卜我先祖魚山故兆唯吉土十月乙  
酉是朔用大定我先人之宅遣車既飭惟不肖子補之  
將之悽愴怵惕殞越于地則亦靡及尚饗

告六叔父寺丞文

維元豐七年十月日姪濠州團練推官知壽州壽春縣  
事充北京國子監教授補之謹以清酌庶羞之奠告于  
六叔父寺丞之靈曰昔我叔父事親竭力夙以孝聞薰  
然慈仁見謂鄉黨宜貴宜富宜壽考多子位祿弗究以  
不永年承其後者藐然一女補之念此常痛于心惡衣  
菲食用克歸匱于魚山之宅十月乙酉是塋前我先祖  
後我先人筮曰宅此惟安乃歲時薦享則有先人之不  
肖子補之在乃先人之祀未墜于地則我叔父飲食如

生惟我先祖先人實聞斯言尚饗

北京祭措置李宣德文

維元豐七年月日具官晁補之謹以清酌庶羞之奠致祭于故措置司句當公事李君漢舉宣德之靈曰嗚呼漢舉志如鴻鶴可使戾空而弊羽毛乎污澤才如泉阿可用剗玉而頓銑刀乎腥膻仕弗充乎其位壽弗究乎其年理有是而更非喟誰者其使然抑造化之範人亡予奪之或偏謂人心其不平分薄厚乎愚賢嗚呼漢舉

別幾何時黃葉在戶而車而馬娶者稱遽酤酸肴拂君  
往不御惟有涕洟東門之路何以遣哀歸安其故尚饗

除夕祭北京教授廨土地神文

維元豐七年十二月晦具官晁補之謹以清酌庶羞之  
奠祭于土地之神曰聞之福莫長於無禍故古之君子  
祭不欲祈補之不才承乏三年于茲將代而去矣賴神  
壅培弗罹于咎祈則何敢報可忘乎恭薦菲詞惟神鑒  
此尚饗



罷齊州先塋焚黃告祭文

紹聖二年二月八日男左承議郎充祕閣校理新就差  
通判應天府南京留守司畿內勸農事武騎尉補之謹  
以清酌庶羞之奠敬祭告于先君著作晃公之墓曰補  
之不肖始葬先君之三日還官于魏其後忝命入館登  
朝為州逮茲謫官凡十一年而後始獲拜奠墓下楸柏  
盡拱而不肖子補之尚官遊四方不能反田里奉洒埽  
休惕隕心今天子以元祐壬申十一月甲子冬至郊見

天地凡在庭之士皆得追榮其先人初以左奉議郎告于第恭承光命既慙以哀惟是先君之潛德隱行天其或者尚將大之在它子孫非不肖子補之獨能致此謹撰日以告尚饗

代澶州韓諫議祭河文

維年月日具官韓某謹以牢醴之奠告祭于靈源王之神曰天子以季秋祗見合宮禮成告祭及河喬嶽罔不率舉而某位古諸侯境內之祭得預行焉惟神聰明正

直國有典祀靈長之性并千七百載厚地而不洩坎德  
既平則惟神祥以茂昭聖天子之功神之血食終古豈  
不韙歟尚饗

代祭龍女文

維年月日某官韓某謹遣某奉命服詔敕以牲酒之奠  
告于神濟夫人之神曰有天下者祭百神故五嶽四瀆  
古有典祀而山川之靈其福足以仁其一方者則天子  
亦為之崇禮秩嚴貌像所以為施報甚美也惟神聰明

產德于幽其亦歆天子之嘉命允翕巨川底寧北方則  
神之名號惠澤洋洋與河亡窮豈不休哉尚饗

國子監祭司馬溫公文

維元祐元年九月日具官某等謹以清酌庶羞之奠致  
祭于故丞相司馬公之靈曰嗚呼公乎寬粟柔立根于  
明誠進禮退義世為重輕千乘不居古稱好名公乎不  
然志合則行布被脫粟他人為詐公乎不然則以身化  
公卧洛師閉關却埽浚衣講道將以是老公歸朝廷路

車乘馬扶攜襁負民拜于野聖母神孫在宮載祗公率  
其官正人具來誠心行義令出而聽國安九鼎大勢已  
定民以法治法勝則煩譬如魚噍則清其源賣刀緣畝  
盜豈得發苟無欲之雖賞不竊裴公處內如不勝衣問  
其貌年威行四夷楊公入輔曾未幾何毀第減騶人去  
其華忘身憂國晚以骨立生非其厚所愛民力有來遠  
縣廢食與言問民而沒反席未安帝祗合宮公薨訃聞  
徹尊往臨追昨故溫公薨季秋甲戌暮雪民憂歲寒相

諺未褐聞諸道路信有斯言曰公在天胡俾我寒以勞  
定國人曰宜享何以知之家有公像生為民望其沒亦  
神公乎何憾悲者世人尚饗

館閣祭呂申公文

維元祐四年月日具官某等謹以清酌庶羞之奠致祭  
于故平章司空呂公之靈曰嗚呼大人之德如山如川  
作鎮九州經營幅員國有大人君尊而榮地有山川氣  
傑以靈豈惟寶藏百貨所養惟其高深物則固往善觀

國者庶其在茲無象太平望而知之季札觀樂興衰以  
喻見蘧伯玉知衛無故秦使入楚楚寶為陳昭奚卨在  
知楚有人楚衛區區何足與謀有是二臣以雄諸侯如  
虎在林如龍在淵何必風雲其威自然小才近用則不  
若此方圓殊施文武異事一官得人則一事行比事得  
失非國重輕嗚呼公乎敦大中和代天之工道固逶迤  
處厚持滿彊者莫先清心守默辯者莫前是惟元宰三  
公之德豈如淺智物我異職魏公典籌初不自矜既執

弓矢人服其能徐公行義亦既有常世自奢儉吾無低昂巍巍兩朝盛德高名內則國幹外則長城沈幾入告成敗先定家人不知矧復百姓羣言並進不尸其德使公議安人享其澤二聖統臨公秉政機垂紳措笏百辟是儀征繇不興盜賊先改商賈阜通九河輸海謂法未具滋章已除謂財未充民氣已舒謂人未用忠賢既立謂遠未賓羌戎貢入太平之功可指日冀人之無祿天不慙遺兩宮震悼庶民嗟咨哀榮典冊禮盛一時某等



在廷辱公品職陶冶之公無所歸德旂苾簫鼓送公國  
門攄詞隕涕侑此酒尊尚饗

代尚書侍郎兩制祭魏王文

維元祐四年月日某官某等謹以清酌庶羞之奠致祭  
於故魏王之靈曰周建同姓錫之山川康叔伯禽魯衛  
惟賢漢懲秦餘非劉不王矯枉過中尾大股彊魏之宗  
盟禮勝恩疏給羸卒百徒隸與居粵千載來以州郡理  
宗子維城名存實廢作蕃于國匪地惟賢惟賢有德亦

國之蕃漢於孝王欲常常來以家人禮燕喜且諧兄弟  
無遠曰親親仁留不之國亦以厚親嗚呼魏王仁孝忠  
誠威儀卒獲近其性成豈惟河間講禮修樂豈惟東平  
為善最樂惟神母子惟帝叔父尊無與隆恩何可貳在  
人之情再命僊車貴極富溢以勤儉娛作邸于京寔親  
賢宅俾宗室良咸有矜式玉帶魚金顏如渥丹云何不  
淑而不永年兩宮悼驚豈惟在廷詔追榮之以魏大名  
使河山微與國永寧五月而葬禮則有制卜遠歲宜以

恩奪禮衣裳在堂旂旆在門詞以伸哀侑此一尊尚饗

祭歐陽文忠公夫人薛氏文

維元祐四年月日某官某等謹以清酌庶羞之奠致祭  
於故文忠歐陽公夫人薛氏之靈曰嗚呼夫人慶累世  
儲簡肅惟父文忠惟夫象服委蛇湯沐大都世間所乏  
豈富有貴高門鼎食里屬垣比惟有德者愈久彌長或  
微或興微興有光惟昔文忠名擅一時于今學者孰不  
仰之矧夫人子聯職文館升堂拜母恨相從晚生乎可

拜沒饗亦禮庶幾誠心歆此醪醴嗚呼哀哉尚饗

同李昭玘陳察祭贈太師李公文

維元祐四年月日某官某等謹遣某以清酌庶羞之奠  
致祭于贈太師李公之靈曰自昔布衣起家之士必其  
學可用德可立而才可為近可以利當世而遠可以遺  
後人兼是三者公侯之器至其莫施時則不暨公魏大  
姓世豪以資散其千金負笈求師爰以進士得官天聖  
抱其所能而止一令造物報人微與之期是生左丞出

秉政機河鑿其原用改斯卜祿以龍章西山之麓曰子  
曰孫有公及士服其命服承此祭事生雖莫施而沒顯  
名有表其阡邦人所榮某等於公其生既後咸以賤貧  
左丞所厚不獲相事一官所櫻馳詞侑奠亦以抒情鳴  
呼哀哉尚饗

代王資政祭李少保文

維元祐六年月日具官某謹遣某以清酌庶羞之奠致  
祭于故致政少保李公之靈曰天之生才初罔不艱既

界之才其施復難王侯戚里兒童綺紈豈無其人鴆毒  
宴安宴安不懷於公見之非此其賢其才足施真宗之  
甥冀國之子五朝三世恩無與比鳳雛驥駒其生固奇  
置樊檻間世寧識之仁宗恭儉四十二年莪冠大羽文  
武並肩知公於親欲任心膂匪親則嫌或以嫌沮英宗  
退託未攬萬機公不自嫌語秘莫知念先朝意滋欲分  
政知而不以時則有命何以樂之樓觀池園退老于家  
虹蜺屈蟠嗚呼哀哉自昔和文折節好士人賢其賢不

榮其侈公生又似好善有能富貴益恭人以是稱交游  
滿國搢紳有聞高堂擊鍾驪駒在門尚想孟公投轄拒  
戶庶見聲子班荆道路嗚呼哀哉別幾何時人事變易  
蘭亭觴詠俛仰陳迹哀終之典時則有加豈惟故人出  
涕咨嗟寓詞千里侑此尊俎衣裳在筵髣髴一舉嗚呼  
哀哉尚饗

祭陝州二叔父文

紹聖二年十月四日從姪承議郎充祕閣校理通判毫

州軍州管內勸農事武騎尉補之謹遣人以清酌庶羞  
之奠敬致祭于二叔父故知陝州祕監學士之靈曰我  
宗之牒鼻祖澶淵起國之初大于文元務德不華中微  
以艱自我先君諸仲叔季蟬聯世科將隕而起先君嘗  
謂叔父溫文捨叔父賢孰知先君施及不肖如親父子  
匪徒之私自為知已嗚呼哀哉天禍我家先君早世孰  
憐其孤亦叔父志教之譽之人莫間之誤意先君鳴陰  
必和不知其子弱不克荷迺爾代匱丞中祕書叔父為



監聯驂竝裾貧得守齊亦既陞遣病休不省卧憂展轉  
愚觸罪悔佐守宋京書來九返勞撫于行仕何足云匪  
姑息故愛緣其私則以尊祖今年在宋聞疾請州問安  
六輩信無報郵謂昔不然知憊莫勉如何不淑隕命候  
館痛我家世善人日微非此其承其來益衰念此如焚  
血溢為泣怛然寐哭寤追靡及一官所撓真不撫筵孰  
知此哀彼蒼者天尚曰幸哉其子如此不鄙為兄猶同  
父弟誓當與約彌遠益親如我叔父與先君存往不其

亡此舌不吞嗚呼哀哉尚饗

祭外舅兵部杜侍郎文

紹聖二年十一月二十八日第五女壻承議郎充祕閣  
校理通判亳州軍州兼管內勸農事武騎尉晁補之謹  
遣外孫女晁氏十五姐湘以清酌庶羞之奠敬致祭于  
故修撰侍郎丈人杜公之靈曰補之少日愚無師聞聞  
詩與禮于我先君先君為言公孝而賢汝長而師則公  
莫先從先君南年十有五方舟蘭陵遇公于旅會先君

出出拜侍公籠篋于階脩然異容曰此何為玩物喪志  
若斯其年一日千里念先君語竦然起驚公嚴而和導  
我以情却後五年初隨鄉舉過公濮陽與坐笑語謂為  
可教而不瑕疵申以婚媼眷言自茲歸宜其家惟公淑  
女使寡悔尤亦公女助公仕浸顯官常百秩祿仁其宗  
逮孤與疾堂堂在廷如臯如夔至其胸中百不一施謂  
公仁人宜壽宜貴何辜于天而不憊遺國士之喪國士  
之哭失聲相駭迨於僮僕嗚呼哀哉人誰不死死誰則

哀哀在哲人匪婚媾懷念公自養後已先人公疾而憂  
公非愛身衆雖愷地則各有命矧公賢子而憂不競生  
無世累糠粃紛華沒反其真孰為我家謂公之知進乎  
此矣此言之聞公悲可止念公之女毀不圖生去五百  
里勉之使行一官所撓莫不親偃有變其筭公外孫女  
庶幾平生御此酒脯嗚呼哀哉尚饗

祭南京留守刑部杜侍郎文

維元符元年四月日第五姪壻孤子晁補之謹以清酌

庶羞之奠敬致祭於故南京留守修撰侍郎七丈人杜  
公之靈曰嗚呼公乎如金如玉如松如竹雜於物而不  
變稟諸天之所獨而一旦毀折遂不可作耶移孝於事  
君移家於為治賢勞記於先朝名譽流於當世而竟不  
大任遂止於是耶惠故民愛之如父母敬故士戚之如  
兄弟而堂堂去此惟民與士驚心而隕涕嗚呼哀哉昔  
我先君與公元昆義均同產人靡間言施及諸穉申以  
世婚兩宗一家無復彼此矧公與我自為知己我始筮

仕教授北京公為主知而有盛名數言我才于公于卿  
自謂內舉退無愧情我後登朝亦官京師同衢接屋十  
歲於茲宴休戒我游觀載我忘年比義良朋待我而我  
少公十有六歲匪其志同于公敢輩公于學問尤長禮  
經至談百家顧嘗喜兵間同我論挺出崢嶸能賦與銘  
文章爾雅書記翩翩致足樂也自為餘事故罕知者年  
垂六十侍郎秋官平生經緯虹蜺屈蟠白頭不召竟死  
為藩嗚呼哀哉我守濟南後公五載問民所安流風固

在前有范李後有曾王粵有杜公于前有光嗚呼哀哉  
惟我不孝獲罪于天奉親南徙中罹禍還唁我弔我五  
書並馳期我自遠匪婚姻私如何壘室泣血未殞斬焉  
縗經承公凶問嗚呼哀哉自今以往我無知己雖其知  
者亦從風靡傾腸倒胃舌可捫矣尚想山立英姿傑氣  
庶幾神交百世之外嗚呼哀哉公喜我文喜同酒尊尚  
舉此尊尚聞此言嗚呼哀哉尚饗

雞肋集卷六十



欽定四庫全書

雞肋集卷六十一目錄

祭文

特進改葬祭告文

祭大資政李公文

祭左丞梁公文

祭端明蘇公文

祭郭大夫文

亳州祭土地神文

祭大孤山女郎文

河中府謁文宣王文

河中府繫浮橋告河文

祭告舜廟文

追祭呂村山川神文

開隧納誌石祭告文

湖州移天王祠告祭文

卜居金鄉祭神文

遷居安建土地祠文

修井祭告文

新居鑿井告神文

上梁祭土地文

祭西宅旅瘞文

祭西園旅瘞文

祭戴氏地旅瘞文

祭故推官黃君夫人安康郡太君李氏文

齊州祭社稷祈雨文

謁文宣王廟文

謁諸廟文

代保之等告先叔推官文

著作局敕祭文

著作局敕祭賢妃某氏文

代尚書侍郎兩制祭樞密趙公文

--	--	--	--	--	--	--	--

雞肋集卷六十一目錄

欽定四庫全書

雞肋集卷六十一

宋 晁補之 撰

祭文

特進改葬祭告文

維大觀三年歲次己丑十月壬申朔十三日甲申孫前  
泰寧軍節度推官知大名府華縣事端禮等謹以清酌  
庶羞之奠祭告于祖考特進吏部尚書晁公祖妣河間  
縣太君劉氏之墓曰聞之夫子既得合葬於防門人後

雨甚至曰爾來何遲也曰防墓崩夫子不應三言之乃  
泣然流涕曰吾聞之古不修墓夫既反其極矣岸谷變  
遷何由必之故古不修墓者禮也泣然流涕者情也夫  
禮可以不修而情不得視其壞而不悲是夫子許其修  
也而端禮等以祥符大墓土庫有水患雖我祖考妣昔  
以禮葬垂七十年可已矣而端禮等以人揆神情不得  
安將遷厝任城魚山吉卜且我祖考妣之子孫往者皆  
從葬此地烝嘗以時不愆歲事抑族墳亦禮也以人便



之知神欲之亦情也故端禮等以違古不修墓之訓為輕而伸泣然流涕之思為重雜然相恕令月吉日奉柩以東我祖考妣實惠聽之不震不驚往安于行嗚呼哀哉尚饗

祭大資政李公文

維年月日門生具位晁補之謹遣人以清酌庶羞之奠致祭于故北京留守大資政李公之靈曰王跡之熄詩亡不嗣春秋又微戰國橫肆惟其可者尚與聖鄰詞出

其口輪囷郁紛觀左氏言何國無士馳其戎車陳詩說  
禮秦儀賣國斯廼燔書韓非孫武是固非儒至其文字  
孰敢貶諸漢興息民殘編出壞經儒詞士學自此派班  
王兩馬河漢奔渾胡不及古華勝其根乃獨揚雄為書  
準易易不可準相如是式却後得唐纔一韓愈蹠魏踵  
漢侵尋千古宋以文治百七十年壞儒偉士軼古並肩  
公以文鳴起河之北如彼神鳳雲翔覽德惟我神考文  
王之文謂公所作經誥是羣官名用正禮閣其修此公

餘事粵有大猷論秀百人宥死四千人車上僂而公退  
然輔弼三朝時異操同幾顛者數不自為功上建皇極  
以消羣疑斂時五福惟公助之爰開大公旁作穆穆九  
闕畫靜纍纍士復惟古良臣善則稱君造膝之語家人  
莫聞嗚呼哀哉匪歲龍蛇正月己卯賢人之憂庶氓是  
悼嗚呼哀哉補之昔者自魏徂京公以其名上之朝廷  
羈堅附夷千里為輕顧慙幽介文采安有無鹽刻畫祇  
增其醜士報知己匪以其私潔身有義尚畏人知惟不

仰愧神其聽之嗚呼哀哉天不慙遺而喪宗工胡床昨  
夢過雨驚風燕子穿閣池臺半空嗚呼哀哉安陽之吉  
遠不臨壙扁舟東下形以神往寓辭千里以侑酒尊庶  
平生言公猶我聞嗚呼哀哉尚饗

祭左丞梁公文

維年月日從表姪具位晁補之謹遣人以清酌庶羞之  
奠敬致祭於故資政左丞梁公十四丈之靈曰補之少  
日隨親上都公在館閣有聲諸儒間從先君及諸父語

童子無知見公而慕其後推擇正字祕書公由太常擢  
諫大夫買屋城南與公居峙休旬杖屨從公宴喜公後  
秉政既有賢勞王立班行羣邪睨消德高來讒亦不旋  
踵豈公獨傷邦國之痛自昔忠義若此者多天實為之  
人其謂何臧孫諫違以有魯祀孰孝嗣之惟忠臣子豈  
碑不琢無以圖徽尚曰萬里以丹旌歸埋光百年一旦  
射斗詞以伸哀惟其素厚嗚呼哀哉尚饗

祭端明蘇公文

維年月日門人具位晁補之謹以清酌庶羞之奠致祭  
於故端明尚書蘇公先生之靈曰孔子在位獄訟文詞  
可與人同不獨有之至所罕言所不可聞曰天道性與  
利命仁莫大匪天莫難匪利若性命仁皆深遠矣夫惟  
道大則知者希有所卓爾回猶病之天下紛紛皆以利  
往吾豈難之利不可長凡是五者皆微不傳譬彼為國  
魚不脫淵雖微不傳然見其緒千載一人尚如旦莫秦  
漢而還輕失此學徒既其文謂為廣博聖言所罕與不

可聞初莫之聞矧尋厥根匪根之出其華易悴易悴之  
華惟文士愧馬遷韓愈好古而奇六家原道顧未知之  
今其所作匪道惟詞後生如簧談天與利飾性命仁以  
之賈世篤生蘇公干櫓聖門跼韓躡馬匪以其文知孔  
子聖文莫猶人若大且難以藏厥身世無孔子孰明其  
至更百斯年曰此文士豈不炳蔚鏗轟似之至反說約  
窳然過之何以實斯粵有自來馳騁千古經營九垓破  
百家往躡阜踰堆竭其山立送者自崖曰此勤矣乃人

之聞反而湛思道不在遠罕言不聞一以是貫宅道之  
與眇其獨存有不得已文廼其藩固嘗自謂吾言如水  
行所可行止其當止此但言語聊以為嬉惟昔人賢事  
業若斯遭時有用從本出之誠身有道忠廼孝移如麟  
如鳳胡可偽為嗚呼哀哉既曰仁賢宜貴宜壽亦貴壽  
矣于德不究間關嶺海九死來歸何嗟及矣梁木其摧  
嗚呼哀哉補之童冠拜公錢塘見謂可教別垢求光顧  
惟冥頑汔未聞道愧負公語以無成老窮秋訃至沈痛



剗腸扁舟東泛道哭公喪作此鄙詞惟公所喜伸哀一  
慟絕絃自此嗚呼哀哉尚饗

祭郭大夫文

維元符元年某月日晁補之謹以清酌庶羞之奠祭于  
大夫郭公之靈曰人之相知千載一時千載不逢亦不  
可知公年長我二十而八平生出處參辰超忽廉平為  
吏自昔所聞達識高談則猶未親遭惠來南遭迴千里  
偶公倦遊亦歸卧里斬然在疚閉戶薰心我不往拜公

來見尋屬氣收涕為公一語不知何為傾蓋如故過累  
百士得一人焉以千載語則猶並年為公數臨亦惠慰  
我如何不淑龜玉毀破驚呼往弔雪涕霑胸尚想霜髯  
老鶴孤松嗚呼哀哉公守曹南古循吏比吾弟為僚橫  
經泮水頃於吾弟推轂先之晚於此逢我又見知兄弟  
窮人論心誰與公獨厚之人所莫顧百年一慟晤語無  
期何以舒哀斗酒隻雞嗚呼哀哉尚饗

亳州祭土地神文

維紹聖三年歲次丙子十一月戊子謹以清酌庶羞之  
奠祭于土地之神曰聞諸聖言聰明得道者沒乃為神  
而神之所職以土地名譬諸人間則有社稷人之休戚  
繫焉者也補之以罪來此行將解去顧其疎愚何以免  
咎惟履正蹈常無以庇物亦不害物神用臨之亦允助  
之使老幼安處而苛慝不作用此薦誠匪曰祈也以為  
報也尚饗

祭大孤山女郎文

維元符三年歲次庚辰七月癸酉承議郎武騎尉晁補之謹以絲網碧屨及酒酌時果之奠敬祭告于大孤山女郎之神曰補之仕不遇合不敢忘忠而為權臣所憎陷以朋黨于歲己卯竄諸靈山季秋揚帆挈婦與子旅拜神幄陳詞靡它神賜吉占曰歸甚邇偶讀舊載或行遇神神與之言為買絲屨客自都返無從致之留屨水邊遺刀石上發去已遠猶不悟知魚跳客舟刀在魚腹因發歌詠庶神若茲盼蠻有聞而非夢寐旋上干越湍

流迅奔常所玩穿金山革履前夕墮瀨旦乃覺之去百  
里餘不可求訪而一漁艇得於上流履不足云神其可  
信因語室內我言敢欺為神作茲彩約縹緗俟我歸日  
荅神之休今蒙國恩全室還北跪獻几下雖菲而誠尚  
蘄他時為記若贊叙之本末警彼龍聿頑名非淫訛靈實  
烜赫尚饗

河中府謁文宣王文

維年月日具位晁補之謹以清酌庶羞之奠敢昭告于

至聖文宣王曰昔桓榮學尚書仕漢得輜車乘馬矜而陳之曰稽古之力也補之恥之夫士行其志而取償魯連猶知以為商賈之事而榮乃以是矜其門人陋哉補之承乏此邦視事之初恐材不稱祿員所聞於先君子之言以羞當世之士雖稽古不及榮尚庶幾乎知恥是故擇日而薦誠尚饗

河中府繫浮橋告河文

維崇寧元年正月八日朝散郎權知河中軍府兼管內

勸農事兼提舉解州慶成軍兵馬巡檢公事晁補之以  
清酌庶羞及羊二沈諸河敬告祭於河伯之神曰蒲之  
為邦條華障其南龍門隘其北而河出龍門勃怒箭駛  
以經其郭於此為梁謂之蒲津則民之畏神威懷神惠  
舊矣廼潦集梁絕往來者病于濟貨用不通民用恐不  
寧相與愁苦籲神而乞憐神依民者也豈可以數威其  
所依忘惠之哉今有司庀具告橋可復用徼福于神庶  
神許之無搖其成吏免于罪民以懋遷康厥生神亦飲

食百世尚饗

祭告舜廟文

維崇寧元年正月八日朝散郎權知河中軍府兼管內  
勸農事兼提舉解州慶成軍兵馬巡檢公事是補之謹  
以清酌庶羞之奠敬告祭于帝舜之神曰禹治洪水功  
施於河為多迄今河濱濟者呼禹且蒲帝之所嘗居而  
帝使禹者也今梁絕病濟有司圖復之帝相斯人河受  
其職俾無壞于成則禹之功猶賴蒲之民克永事帝尚



鄉食

追祭呂村山川神文

維年月日孤子晁補之謹以制幣清酌之奠敢昭告于  
任城縣之呂村山川百靈丘墓阡陌道路之神曰補之  
不孝獲罪于天頃自丹陽遭罹母喪護匭北歸踰二千  
里日月既迫不能按禮法之舊奉不腆幣牲牢時物謝  
咎徵福于諸明神惟是畚鍤窀穸之事大懼瀆犯以重  
罪悔于茲不孝躬今免喪矣尚以誠心薦茲薄奠惟神

其貸之尚饗

開隧納誌石祭告文

維年月日孤子晁補之將之謹以清酌之奠祭告于先妣壽光縣太君楊氏之靈曰補之等罪逆不孝頃奉喪北歸卜日斯迫既襄大事且終制矣惟孝恭慈儉之美未遑圖紀誠無以詔後人慰諸孤廼故南陽守杜侯紘實惟世婚許以撰述用成斯志差是吉日納諸隧中惟補之等號慕永遠則亦靡及尚饗

湖州移天王祠告祭文

維年月日具位晁補之謹以清酌庶羞之奠敬祭告于  
天王之神曰聞之神民異業欲敬而不瀆前此守居作  
樓城上虛其中以望而寓神其西楹為壁限之望者日  
至而無求於神若此瀆矣今作堂樓左雖庫而嚴吉日  
甲子告神以遷正位乎其中而以私俸飾神之像凡壁  
間儀從海波煙雲之觀復續如初使非夫祈謝潔齋而  
來者不以其時不敢以覲神以為敬而不瀆者在此尚

饗

卜居金鄉祭神文

維元符二年歲次己卯正月丙辰孤子晁補之謹以羊  
頭一猪頭一青幣酒果之奠祭告於金鄉縣東郭山川  
土地之靈曰補之家世僑居此州六十餘年矣蒙先之  
澤不絕如綫而補之不肖不知修身服生業為齊民廼  
以其空言曲學欺取國家之名第以出入閨省游行四  
方就食取容無愧慙於心忠不足於君孝不足於親天

用丕降禍罰於其不肖躬大困而歸怵惕隕心垂死未  
絕念不可以不畏天重怒而訛厥衷故卜涑之東尚以  
休老而芘其孥雖曰五晦廣而盜天地之利已多惟神  
其假之若厥心神所臨不敢徼福於神覬厥躬光大惟  
寢斯安無恫瘝於其家暨厥後以康則神力能鑒助茲  
尚饗

遷居安建土地祠文

補之改居市南既告神以遷矣寒暑一周畚鍤無方寢

安而動古非神不害何以得此是用擇日還神之舍將  
加塗墍繪寫衛從以嚴事神惟神終相之尚饗

修井祭告文

易改邑不改井補之居于此惟井因舊而歲久且泥至  
於不食以虛神之患廢養而不窮之功將修復之尚懼  
畚鍤觸禁以重其家之尤悔用以誠告惟神猶知之尚  
饗

新居鑿井告神文

補之相宅此地實故民居棄壤而無井飲民棄已取凡以不爭然叩門戶而求水則亦病矣吉日丁卯位不觸禁爰具畚鍤有謁于神神惠聽之假方仗土俾洌而食則豈惟其室是賴亦用勿幕以仁四鄰神之休如井不匱尚饗

上梁祭土地文

維大觀二年正月壬子朔十六日丁卯具位晁補之謹以清酌時果之奠祭於土地之神曰補之自郊垆改宅

邑廩既告於神矣以日之吉架梁于其室不遠之復自  
其素心將休老此境尚克永康以裕其子孫方久事神  
惟神其祐之尚饗

祭西宅旅瘞文

維年月日具位晁補之遣私從趙采芝以楮幣酒食之  
奠致祭于縣牛驢街東西地內無主骸骨之靈曰補之  
買此邑中地輸租王府而居之眷言爾曹僑瘞茲久主  
至客避則惟厥常幽明不糅亦各其願且處世若夢是



身非汝蛇蟬能蛻人豈不如超然去之亦汝所樂况方  
春掩骼著在舊典敞園漏澤時惟新政往即爽塏我非  
不恩尚饗

祭西園旅瘞文

維年月日具官晁補之遣其從者趙采芝以酒食告祭  
于新居西園旅殯之靈曰聞諸往記世人所以多責過  
疾癘困畏不如欲者皆緣冢訴夫盜破冢取貲與好事  
者利冢中玩掘取與主知取地而不卹暴骨如棄瓦礫

若是而冢訴能崇之可也今主以錢買此居爾死者或家貧賣地取給自改瘞爾與家無人而主言諸官官以法與爾地及斂具而藏之又為置守使無侵犯歲時得食飲豈不幸哉往從所安主無所任咎嗚呼哀哉尚饗

祭戴氏地旅瘞文

維年月日具官晁補之遣白直王立以清酌餅餌之奠告於北坎旅瘞之靈曰爾等或生貧賤葬不具禮掩坎窞間潦集之患固非其所安今朝廷闢漏澤園徧於天

下主欲用地而請于官以爾骸遷又飲食送汝為詞以  
曉之高原可宅爾永無患亦爾之願也尚饗

祭故推官黃君夫人安康郡太君李氏文

維元祐六年九月日左宣德郎充祕閣校理通判揚州  
軍州事晁補之謹以清酌庶羞之奠致祭于故某郡太  
君李氏之靈曰李望隴西世德之延作嬪于黃黃江左  
賢雍雍睦睦閭內之儀不見夫人視其諸兒補之頃歲  
倦游北門見夫人子今校理君輔我以仁挽之近古定

交一言匪婚姻故其後按理單車過魏入拜吾親如母  
姒娣吾親顧語惟愚補之君辱與游實彫琢之補之忝  
命亦登文館聯驂並室笑語宴衍入拜夫人謝卧疾久  
扁舟來南不問安否如何不淑而不永年泣涕竹西銘  
旌在船雙井之里山奔水委往休于宮從其君子恩封  
大郡詔賻其喪夫人何憾後方大昌嗚呼哀哉尚饗

齊州祭社稷祈雨文

吏慢不德無政事無以奉社稷而臨民人夏潦為災此

邦之失業未復者戶十二且他邦之轉徙廩食者寓焉今冬又不雪至春不雨將大饑疫吏何以為吏民何以為民神食於其土吏可罰民不可窮也何為使至於此極哉顧吏無辭以謁於神而誠可哀庶幾潤澤沛然一洒之尚饗

謁文宣王廟文

補之學經從仕踰三十年蓋更守四郡矣才出中下不足與語任重而道遠以趨米鹽期會且不給盟洗登降

有覲其顏語不云乎有人民焉有社稷焉何必讀書然後為學則雞鳴而起坐堂對吏旦旦設施皆嘗所聞於先君子之言也安敢愼哉故因視事撰日以告尚饗

謁諸廟文

吏視事三日則謁於境之神舊矣承宣主澤則吏之責而水旱疾疫休戚其一方者神實司之吏可以不任其責而忘徼福於神哉恭薦菲詞神其相此尚饗

代保之等告先叔推官文

維年月日男保之付之謹以清酌庶羞之奠祭告于先  
考推官之靈曰保之等不孝童幼嬰禍綿力弱志惟慢  
葬是懼既窆窆及吉卜而誅行琢石于今缺然惟我先  
祖父之孫先伯父之長子今朝散大夫管句南京鴻慶  
宮補之少與先君同硯席先君愛之猶同氣實為銘詩  
用發潛德慰先君之不遭納諸塋中以詔後世如先君  
在尚饗

著作局敕祭臬官文

惟靈受才宏傑被擢先朝忠能致身武足敵愾入長親  
衛出帥征徒精神折衝為國威重宜膺介福奄及淪亡  
爾惟虎臣予用震悼褒終有典不在牢羞嗚呼哀哉  
尚饗

著作局敕祭賢妃某氏文

惟靈夙以恭惠嬪于先朝警戒之美宮闈所範宜膺介  
福壽考而康云何不淑奄忽淪謝歲月之吉閔神有期  
視秩一品則惟古制尚其不泯歆此寵榮嗚呼哀哉尚



饗

代尚書侍郎兩制祭樞密趙公文

維元祐四年月日某官某等謹以清酌庶羞之奠致祭  
于故樞密趙公之靈曰天之於人若絕而通人之戚休  
天實與同國之方興視所生賢天將啟之推往引還有  
煒其初以厚其名中勞苦之後使大興嗚呼公乎令德  
嘉言何以知之治平之元堂堂數公如鳳如麟秉義正  
辭引君於仁匪忠則難視功何如俾羣疑安為萬世圖

方冬沍陰公對延和帝指公言天意儆予堯言民誦民  
聞子來使民戴堯功孰與偕中和信誠有政在民留安  
去懷黃霸寇恂蕭公在外雅意王室匪身詘信惟道枉  
直心廣體胖不泰而康公不為名耆老益光二聖當天  
問於遺訓凡公數人皆起輔政用公西府柔遠弭兵夷  
蕃在庭耕旅不驚河安北流羣議東之民洵洵憂裏糧  
坐堤公持不回如治平時人言踵聞詔休役屯此豈人  
力皇愛下民嗚呼哀哉帝虛相席族忠與勲謂公帝圖

公訃奄聞兩宮悼驚悲遠庶氓沉於某等位皆近臣承  
顏接語周旋昔時咨嗟涕洟則匪我私百夫引輶送公  
還里壽貴有聞公于何悔尚饗

雞肋集卷六十一